



Vischnaunca  
**Tujetsch**

## **Protocol dalla radunonza da vischnaunca**

dils 27 da settember 2023

allas 19.30 uras en Sala Cristalla a Sedrun

**Protocol dalla radunanza da vischnaunca dils 23 da settember 2023  
allas 19:30 uras entochen allas 20:40 uras,  
ella sala Cristalla a Sedrun**

---

Presidi: Martin Cavegn (president communal)

Protocollista: Simona Giossi

Dumbravuschs: Silvio Schmid e Reto Schmid

Presents: 36

Perstgisas: -

### **Tractandas**

1. Avertura
2. Lescha per far diever dallas vias d'uaul e da funs cun vehichels a motor
3. Revisiun dalla lescha e dil regulativ davart l'economisaziun dils rumians dalla vischnaunca da Tujetsch
4. Contribuziun ord il fondo per la promoziun dil svilup economic per la Andermatt-Sedrun Sport AG
5. Orientaziuns
6. Varia

## **1. Tractanda            Avertura / Beinvegni**

Il president communal Martin Cavegn fa in cordial beinvegni a tuttas Tuatschinas ed a tuts Tuatschins ed als commembers dalla cumissiun da gestiun alla secunda radunonza da vischnaunca dil trienni 2023/2026.

Naven dad ussa fagein nus mintga gada ina controlla d'entrada cun surdar cedels da votar, per aschia segirar che mo personas che han il dretg da votar prendan part allas votaziuns. Sch'enzatgi banduna la sala duront la radunonza eis el obligaus da returnar il cedel ad in dils dumbravuschs per che quels sappien adattar il diember dallas personas presentas.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ella Tuatschina nr. 17 dils 1 da settember 2023 ed ella Tuatschina nr. 18 dils 15 da settember 2023, sco era entras la retschevida dil messadi en mintga casada dils 13 da settember 2023.

Ils posts da dumbravuschs sorprendan Silvio Schmid e Reto Schmid, commember e president dalla cumissiun da gestiun.

Tenor art. 34 lit. b) alinea 4 dalla costituziun communal astga vegnir priu decisiun sulettamein davart las tractandas ch'ei stadas publicadas e ch'ei vegnidas predeliberadas dalla suprastonza communal.

Tenor art. 30 alinea 1 dalla lescha davart ils dretgs politics vegnan las votaziuns fatgas per ordinari cun maunpli. Tier votaziuns cun maunpli ei la pluralitad da quels che voteschan decisiva. Ein las vuschs ulivas, lu ei la damonda renviada.

Tenor art. 30 alinea 3 dalla lescha davart ils dretgs politics sa ina quarta dils votants presents pretender scrutini. Tier votaziuns cun scrutini decida il pli absolut dallas vuschs valeivlas. Ein las vuschs ulivas, lu ei la damonda renviada.

Tenor art. 35 litera n) dalla costituziun communal ha la radunonza da vischnaunca la cumpetenza da suttametter las fatschentas alla votaziun all'urna. La pluralitad da quels che voteschan ei decisiva.

Tenor art. 24 dil regulativ da fatschentas pertuccont il cussegl da vischnaunca ch'ei vegnius abolius tenor la nova costituziun da vischnaunca, ei stipulau ch'ei ha per regla liug all'entschatta dalla deliberaziun ina debatta d'entrada. Enstagl d'ina debatta d'entrada, sa vegnir arranschau ina discussiun generala. Era sch'ei dat buca pli il cussegl da vischnaunca, vegnin nus ad agir en quei senn.

Tier mintga tractanda fa il president communal ni la geraua ni il gerau responsabel ina presentaziun dalla fatschenta.

Silsuenter fa il president communal avon mintga tractanda la damonda, schebein ei vegn giavischau ina debatta d'entrada ni ina discussiun generala. Sche quei ei buca giavischau, vegn iu vi ella tractaziun.

Tractandas 2 e 3 presenta il gerau Guido Monn. Tractanda 4 presenta Martin Cavegn, il president communal.

Il protocol vegn mo publicaus sch'ei dat protestas. Sch'ei dat neginas protestas enteifer 30 dis naven dalla publicaziun, vegn il protocol approbaus automaticamein.

## **2. Tractanda            Lescha per far diever dallas vias d'uaul e da funs cun vehichels a motor**

Gerau Guido Monn presenta la tractanda 2.

Il cussegl da vischnaunca ha decidiu alla seduta dils 21 da zercladur da far ord il reglament ina lescha per far diever dallas vias d'uaul e da funs cun vehichels a motor. Las determinaziuns vegnan pia definidas ella lescha. Ina lescha sto adina vegnir approvada alla radunonza da vischnaunca.

Amplificaziuns respectiv midadas ein sedadas en connex cun la nova constituziun communal e la nova lescha da parcar e campar.

Tier ils suandonts artechels havein nus fatg amplificaziuns:

Art. 1. b)

Ei ha dau duas amplifiaziuns, numnadamein ein duas vias vegnidas vitier. Quei ei la via Crest Stavlaz tochen sut la Camona da Maighels e la via Tiarms cun la part viers il Grischun. Giudem la via Tiarms havein nus ina part dalla via che s'auda al cantun Uri. Els han gia ussa si ina tabla da scamond. Nus essan secunvegni cun els ch'els vegnien buca ad intervegnir cun castitgs, cunquei che nus havein ussa la regla ch'ins astga carrar quella via cun la carta.

Art. 3 b) cefra 2 c)

Cheu havein nus sulettamein amplifiauu che cartas per tuts raiuns san mo persunas cun domicil en vischnaunca retrer.

#### Art. 4

Cheu ein en general las taxas administrativas vegnidas adattadas;

##### A. Diever agricol

Ei dat da niev era cartas annualas per il diever agricol. Ina carta annuala per in raiun ei da niev tenor art 3 a) frs. 25.00. Ina carta annuala supplementara per in raiun tenor art. 3 a) ei frs. 5.00 ed ina carta annuala per tuts raiuns tenor art. 3 a) ei frs. 50.00 Quella carta custava avon frs. 100.00.

##### B. Ulteriur diever

Per igl ulteriur diever cuosta ina carta annuala tenor art. 3 lit. b) alinea 2 a) – c) per in raiun frs. 50.00. Ina carta annuala supplementara tenor art. 3 lit. b) alinea 2 a) – c) cuosta per in raiun frs. 10.00 ed ina carta annuala tenor art. 3 lit. b) alinea 2 c) cuosta per tuts raiuns frs. 100.00. Quella carta ei gia dapi liung temps in giavisch dil pievel tuatschin che nus vegnin uss ad ademplir.

##### C. Carta da legitimaziun per in di, per ina jamna ni per in meins

Vinavon dat ei era la pusseivladad da retrer ina carta per in di frs. 5.00, ina carta per ina jamna frs. 10.00 ed ina carta per in meins frs. 20.00.

#### Art. 5

Cheu havein nus aschuntau igl artechel cun la determinaziun 'Vias d'industria'. Tier las vias d'industria ei ina via vegnida vitier. Quei ei la Via Las Rueras naven dalla centrala dalla Axpo entochen tier il territori d'industria. Che las vias da quartier han ina tonnascha da 18 tonnas ei vegl e corrispunda buca pli alla realitad. Denton havein nus decidu da schar quei aschia. Cu nus havein en 30 onns sanau tuttas vias savein nus lu carrar cun max. 32 tonnas sin talas.

En general aunc in'informaziun che l'administraziun communal vul ir cul temps e vegnir pli moderna. Aschia vegn ei naven da l'auter onn ad esser pusseivel da pagar cul sistem da parkingpay. Quei ei il medem sistem sco da pagar ils parcadis. Ins sto en quei senn buca pli ir sin canzlia, mobein san ins far quei cul smartphone ed in QR-code. Il pli tard la primavera 2024 lein nus che quella purschida vegni messa en funcziun.

Silsuenter fa il president communal avon mintga tractanda la damonda schebein ei vegn giavischau ina debatta d'entrada ni ina discussiun generala. Quei ei buca ils cass ed ei vegn iu vi tier la tractaziun dalla fatschenta.

Silvio Schmid, convischin da Sedrun / president dalla cumissiun da gestiun:

Tier alinea c) stat scret clar ch'ei setracta da cartas per in di, per ina jamna ni per in meins. Tier il diever agricol ed igl ulteriur diever vesan ins buca per con ditg che la carta vala. Egl art. 3 stat ei scret che la taxa vala per in onn, denton vesan ins buca quei tier igl art. 4 a) e b).

Tier Art. 4 alinea a) diever agricol e b) sut ulteriur diever eis ei buca clar per tgei temps che las taxas vegnan incassadas. Ins savess amplificar il tetel cun la terminologia “taxa annuala”.

Martin Cavegn, president communal:

La proposta ei pia d’adattar sut art. 4 a) diever agricol, *taxa annuala* e tier b) ulteriur diever, *taxa annuala*.

Benedetg Hendry, convischin da Sedrun:

Jeu vi far in compliment che las taxas ein mudestas. A Mustér pagan ins per ina carta dil di frs. 10.00 e tier nus ei vegniu fixau ina taxa dil di da frs. 5.00.

Tier Art. 4 alinea 4 stat scret che las cartas da legitimaziun seigien ligiadas al vehichel. Quei ei gie buca pusseivel sch’ins paga cun parkinpay.

Martin Cavegn, president communal:

Nus stuein dar la pusseivladad a tuttas persunas da retrer ina carta, era a quellas che possedan negin smartphone. Aschia che quei artechel sto star en la lescha. Tgi che paga digitalmein gnanc sa deponer la carta el vehichel. La controlla vegn fatga sur in sistem digital.

Silvio Schmid, convischin da Sedrun / president dalla cumissiun da gestiun:

Ins savess amplificar cun “excepiu quels che han pagau digital”.

Benedetg Hendry, convischin da Sedrun:

Capeschel jeu endretg ch’ei vegn mess sin mintga tabla all’entschatta dalla via da funs in placat cun si il code da pagar? Quei fa senn e nus havein lu il medem sistem sco quei che nossas vischnauncas vischinas han gia inoltrau.

Martin Cavegn, president communal:

Exact aschia vegn quei fatg. La controlla digitala ei bia pli semplia e spargna alla vischnaunca empau lavur.

**Votaziun:**

**La radunonza da vischnaunca decida unanimamein d’approbar las adattaziuns dalla lescha (marcadas cun tgietschen) per far diever dallas vias d’uaul e da funs cun vehichels a motor cun adattar la terminologia dil suandont artechel:**

**Art. 3**

**a) Diever agricol**

**<sup>1</sup>Pil diever agricol e duront il temps d'alpegiaziun (vechichels cun numera alva ni autos cun numera verda) vegn dau ina carta da legitimaziun *annuala da carrar*.**

**Las qualas van en vigur naven dils 1 da schaner 2024.**

### **3. Tractanda        Revisiun dalla lescha e dil regulativ davart l'economisaziun dils rumians dalla vischnaunca da Tujetsch**

Gerau Guido Monn presenta la tractanda 3.

Tier quella tractanda setracta ei puspei sulettamein da midadas d'ina lescha actuala. Tier ils suandonts artechels dalla lescha e dil regulativ havein nus fatg amplificaziuns:

Art. 17

Per saver recaltgar dapli entradas havein nus definiu da niev ina rama da taxa da 0.05 – 0.10 promil enstagl vegl 0.02 – 0.07 promil, cun quei che nus essan ils davos onns buca vegni da curlcar il deficit che la deponia Prau Cumin cuosta a nus. Quei fact ha quasi sfurzau nus da far quei pass. Ils cuosts ein carschi dapertut, per exempel tier ils transports e la dismessa.

Igl onn 2022 havein nus giu in deficit da frs. -8'780.03. Las entradas stuessen en sesez curclar il deficit. Sche nus alzassen pil mument per 0.01 promil che fa ora ca. frs. 10'000.00, lu fuss quei gia il cass.

Art. 2 alinea 6

a)        Taxas

Il cussegl da vischnaunca ha fatg la proposta e lu era decidu alla seduta dils 21 da zecladur 2023 d'alzar la taxa per rauba blocconta naven da frs. 280.00 sin frs. 320.00 per tonna. Quei alzament cuarlca in ton dils cuosts.

Vinavon ha il cussegl da vischnaunca proponiu e decidu da metter la taxa da cartun e la taxa da material organic adattau per cumpostar sin gratuit.

Gratuit per il pievel munta denton ch'ils cuosts per la vischnaunca restan e quels ein buca pigns. Il container da cartun caschuna secapescha vinavon cuosts alla vischnaunca. Vitier vegn era che nus havein in problem cun casas da colonias ni cun ustrias che disemettan il cartun en loghens ch'ei buca adattai. Era quei caschuna alla vischnaunca cuosts. Era il material organic ch'ei adattaus da cumpostar caschuna cuosts. Ins sto volver ei ed anflar in liug adattau per dismetter. Sche quei reussescha buca, lu vegn il material barschus e quei caschuna cuosts

che vegnan surpris dalla vischnaunca. En general san ins dir: Nua ch'ins fa neginas entradas, vegnan ils cuosts curclai cun in alzament en in auter liug.

Martin Cavegn, president communal:

In alzament da 0.01 promil ein ca. frs. 10'000.00. Quei vul dir: Sche nus alzein naven da 0.06 promil sin 0.07 promil, vegnin nus da recaltgar frs. 10'000.00 dapli entradas. La rama dalla lescha lubescha d'alzar tochen max. 0.10 promil.

Nus havein buca el senn d'alzar la taxa, denton astgein nus buc emblidar che la schigentera da gliet a Zignau vegn sliçada si e nus stuein transportar il gliet entochen a Cuera. Quei caschuna secapescha dapli cuosts. Vinavon pren era la carischia tier mintg'on.

Silsuenter fa il president communal avon mintga tractanda la damonda schebein ei vegn giavischau ina debatta d'entrada ni ina discussiun generala. Schei quei ei buca giavischau, vegn iu vi ella tractaziun.

Cunquei ch'ei vegn buca giavischau ina debatta d'entrada passa il president tier la tractaziun dalla faschenta.

Silvio Schmid, convischin da Sedrun / president dalla cumissiun da gestiun:

Daco ei vegniu strihau ora la taglia sin plivalur (tpv)? Ei quella zuppada en in'otra taxa?

Martin Cavegn, president communal:

Na. Nus lein adina che la taxa da tpv actuala vegni risguardada. Naven digl onn 2024 crescha quella numnadamein puspei. Sche nus mettin en ina taxa fixa munta quei che nus stuessen teoreticamein tschentar ils quens cun ina fallida taxa da taglia sin la plivalur.

Ei vegn buca giavischau vinavon il plaid.

#### **Votaziun:**

**a) La radunonza da vischnaunca decida unanimamein d'approbar las adattaziuns (marcadas cun tgietschen els art. 17 e 18) dalla lescha davart l'economisaziun dils rumians dalla vischnaunca da Tujetsch.**

**b) La radunonza da vischnaunca decida unanimamein d'approbar las adattaziuns (marcadas cun tgietschen els art. 2 e 6) dil regulativ dalla lescha davart l'economisaziun dils rumians dalla vischnaunca da Tujetsch.**

#### **4. Tractanda    Contribuziun ord il fondo per la promoziun dil svilup economic per la Andermatt-Sedrun Sport AG**

Martin Cavegn, president communal:

La vischnaunca da Tujetsch ha ina lescha che regla tgi che retscheiva daners ord il fondo per la promoziun dil svilup economic. Las damondas ein mintgamai multifaras ed ei drova ina examinaziun da rudien. Per saver capir daco la suprastanza communal propona da dar ina contribuziun alla Andermatt-Sedrun Sport AG eis ei da seregurdar vid la contribuziun che la vischnaunca ha dau allas pendicularas Mustér SA avon dus onns.

La vischnaunca da Tujesch ha ina cunvegrientscha cullas pendicularas da Mustér che pretenda che Mustér sto separticipar als cuosts dil sutpassadi tier la sanaziun dalla staziun a Sedrun. Deplorablamein era ei mai vegniu fixau ina summa concreta en quella cunvegrientscha. Vinavon ei el medem mument stau da decider con la contribuziun sin maun dallas pendicularas Mustér als parcadis si Pitgmun ei dad esser e con aulta che la participaziun vid ils cuosts annuals da quels ei. La damonda da baghegiar dalla realisaziun dalla pendiculara si Cuolm da Vi ei vegnida tractada en ina procedura entras igl Uffeci federal da traffic (Plangenehmigungsverfahren). Tier la lubientscha da baghegiar ei denton mai vegniu francau ina summa necessaria da parcadis si Valtgeva, aschia che quei ha stuiu vegnir contrahau cun las pendicularas Mustér.

Tier la damonda da baghegiar dall'ustria si Cuolm da Vi ei il diember necessari da parcadis tenor las perscripziuns ella lescha da baghegiar staus clars. Suenter liungas contractivas ein ins secunvegni ch'ils parcadis tier la pendiculara da Cuolm da Vi ei part dalla pendiculara e per ils parcadis dall'ustria san las pendicularas Mustér far diever dils parcadis dalla vischnaunca vi Pitgmu e pagar ina recumpensaziun sco era ina summa annuala per il manteniment. Ei setracta cheu da 33 parcadis per la pendiculara e 30 parcadis per l'ustria.

Per il mument ei la revisiun dalla planisaziun locala en elavuraziun ed ils parcadis si Valtgeva sco era ils parcadis si Pitgmun ein aunc buca approbai. Quei ei pér il cass suenter l'approbaziun dall'entira revisiun dalla planisaziun locala. La damonda resta pendent tier il cantun.

Per vegnir anavos tier la contribuziun en damonda, eis ei da dir vinavon che la vischnaunca da Tujetsch ei - en connex cun la finanziaziun dil sutpassadi e la rampa tier la revisiun dalla staziun a Sedrun - secunvegnyida che las Pendicularas Mustér SA ston, sin fundament dalla cunvegrientscha, separticipar cun ina summa da frs. 200'000.00.

Sin fundament dalla damonda per ina contribuziun ord il fondo per la promoziun turistica ei quella contribuziun vegnida reducida da frs. 200'000.00 sin frs. 100'000.00 e quei sin fundament dalla decisiun dalla radunonza da vischnaunca. Quei denton sut la cundiziun che l'ustria nova vegni baghegiada els proxims onns. Pia han era las pendicularas da Mustér retschert ina contribuziun da frs. 100'000.00.

Quella entira historia ei ussa serepetida culla construcziun dalla nova ustria si Valtgeva. Las pendicularas Andermatt-Sedrun Sport AG (ASS) han onns ora pagau ina contribuziun per l'utilisaziun dils parcadis silla staziun a Sedrun. La damonda davart cons parcadis che la nova ustria basegna e con aulta la contribuziun ha dad esser ei stada da tractar. Sin fundament dallas prescripziuns dalla lescha da baghegiar munta quei a 30 parcadis aschia ch'ins ha saviu applicar las medemas summas sco tier las pendicularas da Mustér. Tier la lubientscha da baghegiar ei quei vegniu determinau che la ASS ha da pagar la cumpensaziun sco era da pagar ina summa per il diever annual. Sin basa digl agir tier las pendicularas da Mustér ha era l'ASS inoltrau ina damonda per ina contribuziun ella medema rama. Pia ei la suprastonza communal dall'opiniun da tractar omisduas fatschentas egualmein e propona pia da dar quella contribuziun all'ASS.

La ASS investescha uonn rodund frs. 4.5 milliuns si Valtgeva. Igl ei en general adina aschia che sch'enzatgi vul daners, sto el mussar si daco ch'el drova tals, aschia ch'ins sa giudicar sch'igl ei giustificau. Samih Sawiris ha vendiu 55% dallas aczias dalla ASS alla Vail Resorts AG. La Vail Resorts AG ha mess a disposiziun varga frs. 100 milliuns per far tuttas investiziuns necessarias el futur - uonn si Valtgeva. Ils proxims onns ein ulteriuras investiziuns sin territori da Tujetsch planisadas. Per exempel remplazzar las sutgeras en Val Val. Igl ei ussa denton semussau che las sutgeras en Val Val ein en la zona da prighel 1. Ins astga per il mument gnanc baghegiar el medem liug ina nova sutgera. Entras liungas examinaziuns e ponderaziuns han ins anflau ina sligiazion praticabla cun baghegiar ulteriuramein novas lavineras per rodund frs. 4 milliuns. Quei legitimescha lu da baghegiar las novas sutgeras. Era quei ein investiziuns da rodund frs. 30 milliuns. Il plan da Vail Resorts ei ch'els vulan aschi spert sco pusseivel investir en indrezs da far neiv sco era ell'ustria da Milez e quei per il motiv ch'il daner piarda la valeta pervia dalla carischia.

Cunquei ch'il cussegl da vischnaunca ha ils 21 da zercladur 2023 returnau la fatschenta alla suprastonza communal per vegnir cun megliers arguments, ha la suprastonza dau ina secunda schanza alla ASS AG da prender ina secunda gada posiziun.

Tenor la lescha dil svilup economic sto in project esser economicamein supportabels. Tgei vul quei exact dir? Nus havein in fetg bien partenari cun ina fetg gronda fermezia. La ASS investescha grondas summas e Silvio Schmid sco manager da projects mira bein che las investiziuns vegnien era fatgas sin la vart grischuna, vul dir a Tujetsch e buca mo egl Uri.

La sfida da survegnir duas lubientschas da baghegiar ei gronda ed ei drova sustegn da tuttas varts, oravontut dalla vischnaunca da Tujetsch. Sin tut las investiziuns el futur dalla ASS/Vail Resorts ein quels frs. 100'000.00 nuot auter che in segn da renconuschientscha ed engrazieivladad enviars la societad. Tenor las brevs da posiziun dalla ASS dils 18 d'avrel 2023 e dils 4 da settember 2023 ein las pretensiuns pli che ademplidas.

Aunc in exempel: Per che nossa media Dr. Schnabel sappi realisar la sanaziun dalla praxis, sustegn la vischnaunca ella cun ina summa da frs. 300'000.00.

Il cussegl da vischnaunca haveva schau la schelta alla suprastanza communal da decider schebein ins vul dar ils frs. 100'000.00 sco ina contribuziun extraordinaria ni prender ils daners ord il fondo per la promoziun dil svilup economic. La suprastanza communal ha decidiu da setener vid la proposta fatga.

**Debatta d'entrada:**

Negina discussiun generala ei giavischada.

**Tractaziun:**

Negina tractaziun ei giavischada.

**Votaziun:**

**La radunonza da vischnaunca decida unanimamein d'approbar la contribuziun ord il fondo per la promoziun dil svilup economic per la Andermatt-Sedrun Sport AG da frs. 100'00.00.**

**5. Orientaziuns**

**Passapeis comunals, sdremas melnas**

Gerau Guido Monn informescha

Preziadas convischinas, preziai convischins

Jeu informeschel vus davart in pèr pendenzas veglias. Il pievel ha giu il giavisch da s'informar davart ils passapeis respectiv davart il giavisch da novas sdremas melnas a Sedrun ed a Rueras. Quei havein nus fatg bugen. Uss sai jeu presentar ils resultats. Jeu muossel bugen quei cun treis plans.

Igl ei succediu aschia che nus essan stai sil plaz culla polizia cantunala, ils responsabels per la sparta da vias. Igl emprem punct che nus havein mirau ei la segirtad. Els han examinau tut las pusseivladads, nua ch'ins savess far ina sdrema melna. Cheu giogan las normas dalla societad VVSS (Verband Schweizerische Strassen) ina rolla. Ils cantuns sco era la confederaziun han da setener vid quellas normas. Jeu presentel a vus las rispostas che nus havein retschert dalla polizia cantunala. Emprems vi jeu ir atras las normas e silsunter muossel jeu sin mintga plan, nua che quei ei il cass. Crear ina nova sdrema melna ei ina ovra da construcziun. Ins sto agir medem sco sch'ins baghegiass per exempel ina nova punt ni in niev mir. Vinavon sto ei haver sin omisduas varts ina successiun, quei vul dir in trottoir. Vinavon drova ei in'illuminaziun per la notg. Sin mintga vart drova ei in liug da spetga (Warteraum). Ussa vesan ins gia l'emprema problematica. Sche nus havein negin trottoir lu havein nus era negin liug da spetga. Sunter sto la vesta esser sin mintga vart minimum 60 cm aulta tochen 3m aulta sin ina lunghezia da 55m. Vinavon sutessen ella media 3'000 autos carrar sin la via. Tier nus carreschan igl unviern segir buca 3000 autos atras il vitg. La stad po quei mintgaton esser il cass. Il cantun sedrezza clar tenor quellas normas ed il cantun sto era tener en quellas.

La situaziun a Rueras, giu dalla via Crestas sur via cantunala vi e lu vinavon dalla via Parvechel giuadora:

Sin la vart encunter il sid, dalla via Parvechel, ha ei in trottoir. Leu fuss ei pusseivel da construir ina sdrema melna. Sin la vart encunter il nord, via Crestas, ha ei negin passapei, plus eis ei ina via che vegn direct giu ella via principala, aschia che in liug da spetga ei nunpusseivels. La vesta fuss stada dretg e seniester optimala. Il sulet punct che lai buca realisar leu ina sdrema melna ei, ch'il liug da spitgar maunca.

Situaziun a Ruears tier il Hotel Posta:

Leu vegnan ins giu dalla via Sorts, pia il medem problem sco avon. Ins sto puspei spitgar sin ina via, vul dir puspei negin liug da spetga ei avon maun. La vesta fuss denton dada. Da tschei maun dalla via havein nus il trottoir e la vesta encunter Sedrun fuss era dada. Denton la vesta encunter Dieni buca. Leu havein nus buca 55 meters vesta.

Situaziun a Tgamaura:

Ins vegn dalla Via dalla staziun giu e nus havein leu schizun in trottoir da spitgar plus ei la vesta ano ed anen buna. Dalla vart dalla punt havein nus mess a nus sez in crap en via. Il mir pren a nus la vesta. Quel ei memia aults, aschia ch'affons vesan buca surora. Pia era cheu eis ei buca pusseivel da construir sdremas melnas.

Sut quellas cundiziuns mussadas, savein nus buca construir las sdremas tenor las normas dalla polizia cantunala. Els dian che nus savessen teoreticamein far ellas, denton sto lu era la vischnaunca surprender la responsablada sch'enzatgei capeta. La polizia di denton era che nus savein traversar la via nua che nus lein. Igl automobilist sto mirar e tener eri. Mintga automobilist sto carrar aschia ch'el sa frenar igl auto.

Per quels motivs savein nus buca construir quellas treis sdremas melnas sco vegniu giavischau.

Bruno Berther, convischin da Rueras:

Preziada suprastanza, jeu havevel aunc tschentau la damonda per la via enta Dieni.

Guido Monn, genau:

Nus prendin bugen encunter quei e schein intercurir la polizia cantunala sch'igl ei forsa leu pusseivel da far sdremas melnas tenor las normas.

### **Zona 30 a Tschamut**

Martin Cavegn, president communal:

Suenter liungas tractandas e debattas en suprastanza havein nus decidu d'introducir tempo 30 atras il vitg da Tschamut. La decisiun vegn proximamein publicada. Per inoltrar tempo 30 en in vitg ston ins incaricar in biro d'inschignier che fa mesiraziuns da tempo da mintga vart e quei dat ina media. Tenor ils resultats dallas mesiraziuns vegneva ei mo dad ina vart suprassau il tempo. Cura ch'ils resultats ein avon maun, eis ei mintgaton aunc grev da sedecider schebein ins duei inoltrar enzatgei ni buca.

La suprastanza era vegnida duas gadas avon il cussegl da vischnaunca cun la proposta da far in passapei si Tschamut pervia dalla segirtad. Quella damonda ei omisduas gadas vegnida renviada aschia che nus havein uss anflau la sliigiaziun da far zona 30 a Tschamut. Il davos ei quei ina decisiun dalla suprastanza communal. Fertan han ils avdents da Tschamut inoltrau ina petiziun per crear zona 30 atras il vitg. Era entras quella petiziun ha la suprastanza communal priu sia decisiun. La publicaziun vegn lu proximamein ella Tuatschina. Leu han ins

la pusseivladad da far in referendum enteifer 30 dis. Per nus ei quei enta Tujetsch empau in novum.

### **Eleziuns communalas**

Nus havein aunc adina buca anflau ina tiarza persuna per la cumissiun da gestiun. Nus havein l'obligaziun dad encurir quella persuna entochen che nus havein anflau ella. Jeu supplicheschel vus tuts, sche vus sezs haveis interess ni enconuschis enzatgi che ha interess, motivai els da s'engaschar. Igl ei ina fetg interessenta incumbensa. Nus mettin quei ella Tuatschina tochen ch'enzatgi semetta a disposiziun. Nus stuein anflar enzatgi.

### **Termin dalla proxima radunonza da vischnaunca: mesjamna, ils 25 d'october 2023**

Leu va ei per duas leschas, numandamein la lescha davart il provediment d'aua dalla vischnaunca Tujetsch e la lescha davart la dismessa dallas auas piarsas dalla vischnaunca da Tujetsch. Jeu quentel leu cun dapli participonts che oz. La veglia lescha ei ina mischeida da bia caussas, per exempel taxas d'avertura e las taxas da da diever. Uss eis ei aschia che nus havein bia leschas surordinadas dil cantun che sligian si certas parts, sco era la lescha dalla energia alpina che ha aboliu certas parts. Nus havein priu sco basa per quellas duras novas leschas las directivas all'Associaziun grischuna per il svilup dil territor. Quella pendenza ei ca. sis onns veglia ed ei setschentada tier mei. Nus havein luvrau ora las leschas da niev. Tgei che jeu sai gia ussa confirmar ei ch'ei vegn pli sempel e che nus savein reducir las taxas sur la media ora per ca. 10%. Quei vul dir che nus havein per il mument in tec memia aultas taxas. Cheu savein nus reducir ellas. Tier las taxas dalla serenera e dalla canalisaziun, las auas piarsas, savein nus era reducir ella media per 10%. Quei ei ina buna novitad. La sfida ei denton che tier la taxa da serenera e canalisaziun havevan nus avon sco basa la cubatura dad in object. Ins prendeva la cubatura ga in coefficient ed ord quei seresultava la taxa. Tenor la nova lescha prendein nus buca pli la cubatura dalla casa, mobein la valeta nova da tala. Da principi san ins dir che nus quintein da niev enstagl cun meila cun péra. Ei vegn denton circa ora sil medem.

La gronda midada ei segiramein che la taxa da consum vegn erruida ord las mesiras dils dumbraders d'aua. Nus havein l'obligaziun da far quei, pertgei dapi treis onns havein nus protestas pendentas sin vischnaunca e quei da possessurs da habitaziuns da vacanzas che han il dretg da far protesta e che pretendan da montar ils dumbraders d'aua. Nus havein cheu negina letga da dir na perquei ch'els tilan schiglioc vinavon quei avon la Dertgira Federala e leu havein nus sil pli tard lu d'installar ils dumbraders. Plinavon essan nus fetg bein el temps. Il messadi ei bunamein a fin e vegn tarmess proximamein ellas casadas.

Igl ei per la vischnaunca resp. per la corporaziun d'aua in'investiziun da ca. frs. 300'000.00 per cumprar dumbraders. In dumbrader cuosta en affittaziun per onn frs. 30.00. Las datas vegnan legidas giu per func, aschia che negin sto ir en las casadas per far quei.

Las protestas ein era vegnidas inoltradas per il provediment d'aua, pia l'aua che vegn en casa plus per l'aua che va ord casa. Quei ein las auas piarsas. El mument essan nus aunc vid interpoler per anflar ora las endretgas tariffas. Cons promils dalla valeta nova dalla casa e cons promils dalla quantidad d'aua stuein nus definir per ch'il quen mondi si. La taxa fundamentala per la dismessa dall'aua duei cuvierer ils cuosts d'investiziun a liunga vesta. La taxa da consum duei cuvierer ils cuosts annuals. La taxa fundamentala ei per ils cuosts da liunga investiziun ed aschia era pli aults. La taxa da consum d'aua duei esser pli bassa. Cheu dat ei ina decisiun dalla Dertgira Federala che las entradas dalla taxa fundamentala astgan buca survargar 75% dallas entradas totalas. Daco han ins priu quella decisiun? Perquei che la vischnaunca da Lai, sco quei ch'in convischin haveva fatg attent la davosa gada, haveva mess si bia pli ault quella taxa fundamentala. Daco? Tut las habitaziuns da vacanzas drovan pauca aua ed ins ha vuliu definir la taxa fundamentala pli ault. Nus vegnin era ad ir si sin 75% taxa fundamentala per aschia taxar il consum aschi bass sco pusseivel. Quei ei denton ina nundetga calculaziun. Nus vegnin sur tut ora a sminuir ils cuosts. Nus stuein era far quei perquei che nossas reservas ein pil mument avunda aultas. Denton stuein nus sminuir leu nua che la relaziun vegn dada.

Ils 25 da october 2023 decidin nus davart la lescha, denton buca aunc davart ils coefficients. Sur da lezs decida la suprastanza communal. Nus stuein veser che sche nus decidin uss igl onn 2023 d'introducir quella lescha, havein nus ils onns 2024/2025 d'installar rodund 1000 dumbraders. Nus lein aschi spert sco pusseivel che quels dumbraders vegnien installai tier objects impurtonts. Aschia che nus savein en in onn leger giu las datas ed aschia analisar cont'aua che vegn duvrada per exempel en in hotel, en ina casa da colonias ed en casas privatas. Miez digl onn 2025 ston quels dumbraders esser installai, aschia che nus havein miez onn peda per controllar tut. Dumbrau vegn naven dils 1 da schaner 2026 ed igl emprem quen dil nez dall'aua effectiv vegn tarmess egl emprem quartal digl onn 2027.

## **6. Varia**

Bruno Berther, convischin da Rueras:

Ina damonda pertuccont ils protocols. Avon in tschappel onns haveva in cusseglier pretendiu ch'ils protocols vegnien screts plaid per plaid. Da mei anora ei quei surfatg ed jeu sai da biaras convischinas e convischins che s'exprimessen bugen, denton fan ei buca ei perquei che tut vegn dau plaid per plaid. Jeu crei ins savess far ei pli sempel. Quei vul dir metter en ils conclus e scriver pli pauc.

Martin Cavegn, president communal:

Engraziel fetg per tia proposta. Quei vegnin nus a metter sin tractanda. Quei drova ina decisiun. La lescha da vischnauncas prevesa duas sorts da protocols. Nus proponin bugen quei. Per nus fuss quei in grond levgiament. Il protocol dalla davosa radunonza ha dau ina enorma lavur. Per nus ei tia proposta fetg da beneventar. Nus vegnin a tractar ella sin suprastonza e prendin ei tier la proxima radunonza da vischnaunca sin tractanda.

Silvio Schmid, convischin da Sedrun:

Jeu engraziel el num dalla Andermatt-Sedrun Sport AG che vus haveis approbau la contribuziun ed igl ei veramein aschia sco il president Martin Cavegn ha menziunau. Ei marscha fetg bia e nus stuein star vidlunder che las investiziuns vegnien buca mo fatgas vi Andermatt, mobei era cheu tier nus.

Il 28 d'october 2023 ha liug la radunonza generala dalla Andermatt-Sedrun Sport AG a Sedrun. Il president dil cussegl d'administraziun, Mike Goar, vegn ad esser presents. El ha oz buca saviu esser dalla partida, denton era el lai engraziar zun fetg.

Martin Cavegn, president communal:

In engraziament alla protocollista ed allas convischinas ed als convischins da Tujetsch ch'ei vegni ed han priu part activamein alla radunonza da vischnaunca. Jeu sundel fetg satisfatgs che tons ei vegni. Per dir sinceramein hai jeu quintau cun pli paucs, aschia che quei ha fatg grond plascher alla suprastonza communal.

Protocollista:

Simona Giossi

President communal:

Martin Cavegn